



16. september 2022

Inatsisartut ingerlatsinermut maleruagassaasa § 37 imm. 1 tunngavigalugu Naalakkersuisunut ukuninga apeqquteqaateqarpunga:

Naalakkersuisunut apeqquteqaatit:

1. Ineqarnermut Attaveqaqatigiinnermullu Naalakkersuisoq nunarput atlantiku qulaallugu mittarfittaassanut piareersimannginnerarlugu oqariartuuteqarnerminut kisitsisit paasissutissallu suut tunngavigai?
2. Namminersorlutik inuussutissarsiortut akunnittarfinnik sanaartornissaannut aallarnisarnissaat anguniarlugu Naalakkersuisut suut suliniutiginiarpaat?
 - a. Naalakkersuisut namminersorlutik inuussutissarsiuteqartut akunnittarfinnik neriniartarfinnillu sananermikkut igerlatsinermikkullu unammillerniarpaat?
3. Namminersorlutik ingerlatsisut namminersorlutillu oqartussat akunnerminni suleqatigiinnerannut Naalakkersuisut tigussaasunik suut pilersaarutigaat?
 - a. Namminersorlutik inuussutissarsiortut attuumassuteqartut oqaloqatiginissaannut pilersaaruteqartoqarpa?
 - i. Sorliit?
 - ii. Qaqugu?
 - iii. Oqaluuserisassat suut?
4. Ineqarnermut Attaveqaqatigiinnermullu Naalakkersuisup ernummatit taakkartugai tunngavigalugit Naalakkersuisut takornariaqarnermut ingerlatsinermi nikeriartitsinissaminnut suut pilersaarutigaat?
 - a. Takornarissat amerlassutsikkut agguaassisarnermut assingusumik Naalakkersuisut eqqussiniarnerlutik?
 - b. Umiarsuit takornariartaatinut ilaasut akitsuusersorneqarnissaannut imaluunniit akitsuutit pioreersunut Naalakkersuisut qaffaanissaminnut pilersaaruteqarpat?
5. Takornariaqarnermut ilinniakkat qinigaaffik una Naalakkersuisuniit amerliniarneqarnerlutik?
6. Takornariaqarnikkut piginnaasat sulisoqarnikkut nukissatigut pisariaqartitsinermut Naalakkersuisut suut pilersaarutigaat?
7. Nuna tamakkerlugu takornariaqarnikkut periusissiat Naalakkersuisut qaqugu naammassissangatippaat?
 - a. Ineqarnermut Attaveqaqatigiinnermullu Naalakkersuisup ernumassutitut taakkartugai tunngavigalugit Naalakkersuisut annertusaanissaminnut pingaarnersiuniarnerlutik?



8. Naalakkersuisut ingerlatseqatigiiffiit akileraarutaat qinigaaffik una apparnissaanut pilersaaruteqarnerlutik?
9. Takornariaqarnikkut inuussutissarsiummik suliffeqarfimmik aallartitsinissamut ajornanginnerpaanissaanik Naalakkersuisut suut suliniutiginiarpaat?
10. Naalakkersuisut sammisamut allanik paasissutissisinnaanerlutik?

(Inatsisartunut ilaasortaq Anna Wangenheim, Demokraatit)

Tunggavilersuut

12. September 2022 Ineqarnermut Attaveqaqatigiinnermullu Naalakkersuisoq KNR-mut oqariartuuteqarpoq "Nunarput mittarfissuartaarnissamut piareersimanngilaq" aammalu akunnittarfeqarnikkut neriniartarfeqarnikkullu pilersaarusionermut annertusaasoqarnissaa pisariaqarluinnartoq. Naalakkersuisoq oqariartuutigaattaaq namminersorlutik inuussutissarsiutillit akunnittarfiliortariaqartut, taamaattoqanngippallu politikikkut inissisimaneq nalilersorneqaqqittariaqassasoq.

Demokraatiniit liberalitit eqqarsartutut inuiaqatigiit iluaqutissaanik inuussutissarsiorneq siuarsarnerani pilersaarusionerit ammasumik ingerlanneqassasut isumaqarpugut. Taamaattumik Naalakkersuisup ernummateqarnera pilersaaruteqarpalaarneralu eqqarsarnartoqartippara, soorlu suliasaqaraluarluni sinittoqarsimasoq, namminersorlutillu oqartussat ingerlataanik annertusaaniarnertut pilersaaruteqartoqartoq. Nunatta ineriartornissaanut unammillersinnaassuseq periarfissagissaarnerlu pisortat namminersorlutik inuussutissarsiortunut unammillernerasigut ajornarsaarneqalernissaa isumaqatiginngilarput. Ineriartornissamut suliniutini niuernerup killilersorneqanngitsumik ingerlanissaa akilersinnaassuserlu eqqarsaatigineqartariaqarput. Oqariartuuteqarneranut isigisakka paatsoorsimasinnaavakka, Naalakkersuisuniillu tunggavilersorluni akissuteqartoqarnissaa ujartorpara.

Aningaasanut Inatsisissatut siunnersuut 2023 siorna Aningaasanut Inatsimmut sanilliullugu nikeriartoqarsimanngilaq. Taamaattumik nunatta takornariaqarnikkut isaatitsinerulernissaanik siunertaqarneq takujuminaappoq. Aningaasanut inatsisissatut siunnersuummi Naalakkersuisut ineriartortitsinissamut suliniuteqanngillat, soorlu ingerlatseqatigiiffiit akileraarutaannik appaanissamut, aallarnisaanerup nukittorsarnissaanut immaqaluunniit atugarissaarnermut suliniutinut inuiaqatigiinnut tamanut iluaqutaasussanik suliffissanik pilersitsisussanik nutaaliorsinnaaneq annertusarneranut.

Apeqqutit ullut qulit suliffiusut iluanni akineqareersimanissaat kissaatigaara.